

四庫全書

史部

欽定四庫全書

史部

欽定大清會典則例卷八十八

詳校官檢討臣劉 炳

編修臣程嘉謨覆勘

總校官原任中允臣王燕緒

校對官中書臣袁文邵

謄錄監生臣魏右曾

欽定四庫全書

欽定大清會典則例卷八十八

禮部

祠祭清吏司

喪禮二

下

孝誠仁皇后喪儀康熙十三年五月初三日

仁孝皇后崩奉安

梓宮於

乾清宮設

几筵建丹旒於

乾清門外之右

聖祖仁皇帝輟朝成服

妃

嬪宮人咸成服

咸縞素

陳儀駕於

乾清門至隆宗門王以下文武各官皆齊集左翼

官於

景運門外右翼官於

隆宗門外依次齊集王以下入八分公以上進內
於丹陛上內大臣侍衛於丹墀不入八分公以
下奉恩將軍以上滿漢文武官員輪班於

乾清門外兩旁序立舉哀公主福晉以下縣君奉
恩將軍恭人以上民公侯伯一品夫人以下子
男等官夫人以上各依班次於

景運門外齊集公主親王福晉及縣君進內郡王

福晉以下奉恩將軍恭人以上民公侯伯子男
夫人皆於齊集處舉哀王以下各官公主福晉
以下大臣命婦等咸成服凡守

堂子官吏祭

神殿執事官員男婦內監

壇

廟

奉先殿官員內監

陵寢官員內監出征將軍以下兵丁以上妻子漢官命婦皆停給孝服本家見有出痘及父母新喪人等暫停給孝服

几筵前朝晡日中三設奠王以下各官每日早晚齊集舉哀二次凡三日止旗下散秩官仍每日二次齊集

簡命大臣辦理喪儀王以下文武各官不嫁娶不作樂凡二十七日民間凡七日止初五日奉移

梓宮至西華門外

殯宮儀駕全設舁輦校尉民夫

首班末班用校尉餘用民夫

八十人

豫備八人鑾儀衛官四人節示進退文官三品

京堂以下給事中御史郎中以上武官公侯伯

一等侍衛以下叅領輕車都尉王府長史以上

每班各四人管束夫役工部夫頭四人司擊響

尺

後仿此

於奉移時禮部尚書祭輦祭酒三爵過

門橋遣大臣祭酒

聖祖仁皇帝親臨送王以下各官公主福晉以下內府
官命婦以上皆豫赴奉安

殯宮公主福晉以下在圍牆外序立內府官命婦等在
圍牆內序立候

靈駕至跪舉哀候過王以下內大臣都統大學士尚書
子以上公主福晉以下大臣命婦以上隨進按
翼序立舉哀副都統侍郎以下在圍牆外序立
舉哀奉安

梓宮於殯殿祭酒三爵舉哀各退王以下入八分公以上內大臣侍衛每日清晨在

殯宮大門內齊集不入八分公以下奉恩將軍以上及閒散覺羅官旗下官員仍每日兩次在

殯宮外齊集舉哀○凡祭日及奉移日

几筵前仍設午奠晡奠如常遣嫔戚大臣夫人祭酒

妃

嬪公主福晉

皇子王公皆不齊集如繹祭儀

此後仿

在京朝鮮國

使臣亦給白布服免其齊集頒

勅諭訃聞該國遣官到日照例成服○禮部題準見今
三藩叛逆大兵致討恐在外各官舉哀制服有
惑觀聽移文直省免其齊集舉哀制服及遣官
進香○初八日奉

旨擬上

大行皇后諡號遵

旨議準

冊謚典禮請恭擬

謚號後由部交欽天監敬擇日期其香絹

冊寶寶盃冊箱等項交工部敬謹製造祇告

太廟遣官由該衙門奏遣祇告祭文暨

冊文

寶文

冊謚祭文由翰林院撰擬正副使由宗人府開列親王

郡王等名咨部奏遣其讀祝官宣

冊寶贊引典儀奠獻各執事官由太常寺選用恭上

尊謚儀注屆期具奏一切需用器物照例行文各該衙

門辦理○十三日行殷奠禮儀駕全設於圍牆

內陳金銀定三萬楮錢楮帛各三萬饌筵二十

一席羊九酒十有一尊

聖祖仁皇帝親臨王以下文武各官公主福晉以下奉

恩將軍恭人以上民公侯伯一品夫人以下副

都統侍衛命婦以上齊集讀祝文時衆皆跪讀
畢祭酒三爵衆皆三叩興舉哀畢讀祝官奉送
燎所

聖祖仁皇帝還宮衆皆退○是日大祭

北郊遣官恭代行禮豫期視牲看牲咸素服照常齋戒
祭日咸朝服○二十一日行初祭禮儀駕全設
於圍牆內陳金銀定二十萬五千楮錢十四萬
五千畫段萬端楮帛五萬端饌筵八十一席羊

二十七酒四十一尊

聖祖仁皇帝親臨王以下文武各官公主福晉以下縣
君奉恩將軍恭人以上民公侯伯一品夫人以
下男夫人以上齊集讀文祭酒行禮舉哀等儀
與殷奠同是日

聖祖仁皇帝除服

妃

嬪以下宮人咸隨除服

聖駕回宮衆皆退○次日行繹祭禮陳金銀定二萬楮
錢萬饌筵十有一席羊五酒五尊內務府官員
命婦齊集致祭○二十五日行奉移致祭禮儀
駕全設於圍牆內陳羊酒饌筵楮帛如殷奠之
數王以下文武各官公主福晉以下縣君奉恩
將軍恭人以上民公侯伯一品夫人以下男夫
人以上齊集讀文祭酒行禮舉哀如前儀○二
十七日奉移

梓宮暫安於都城北沙河鞏華城

殯宮是日儀駕全設奉移時禮部堂官祭饗所過門橋
遣內大臣祭酒

聖祖仁皇帝親臨送內大臣侍衛於西安門內齊集王
以下奉恩將軍以上於西安門外民公侯伯以
下文武各官於大街兩旁漢官於八旗之下各
按翼序立

靈駕至跪舉哀候過輿不往送各官皆退往送各官出

城外按旗乘馬隨行公主福晉以下縣君奉恩將軍恭人以上民公侯伯一品夫人以下男夫人以上於德勝門外關廂內齊集

靈駕至跪舉哀候過各退至沙河奉安

殯宮設

几筵祭酒三爵王等各官咸隨行禮舉哀各退○二十

九日

聖祖仁皇帝親至鞏華城行大祭禮儀駕全設陳羊酒

饌筵楮帛如初祭之數王以下奉恩將軍以上
民公侯伯以下文武各官公主福晉以下縣君
奉恩將軍恭人以上民公侯伯一品夫人以下
男夫人以上咸齊集讀文祭酒行禮舉哀均如
前儀是日滿二十七日王以下各官公主福晉
以下大臣命婦等皆至焚燎處兩旁序立嫺戚
大臣夫人祭酒三爵衆皆跪每祭隨叩祭畢除
服各退○次日繹祭陳設禮儀與前初祭次日

繹祭同○六月初三日行滿月致祭禮儀駕全
設陳金銀定五萬楮錢五萬饌筵二十一席羊
九酒九尊王以下奉恩將軍以上民公侯伯以
下男以上齊集祭酒行禮如儀百日內每周月
齊集祭酒行禮咸與初周月同百日外惟內府
官員男婦齊集致祭○初七日行

冊諡禮

諡

大行皇后曰

仁孝皇后

謹按雍正元年恭加廟號以仁字重複

謹改孝誠

是日內務府官

於沙河輦華城

殯宮前陳設儀駕設

冊寶案各一香案一於

几筵前內府官設祭品點香燭鴻臚寺官設

冊寶案於

太和門階上

冊案左寶案右鑾儀衛官設

冊寶亭各一於階下正中正副使及執事官皆素服序
立於階下之左內閣大臣奉香

冊寶匣列各案上行一跪三叩禮退立階下之左禮部

官奉絹

冊寶匣豫設采亭內陳設畢禮部堂官奏請

聖祖仁皇帝素服

御太和門座禮部堂官引正副使由東階升詣

冊寶案前各行一跪三叩禮興正使奉

冊副使奉

寶由中階降設采亭內行一跪三叩禮禮部堂官奏禮
成

聖駕還宮校尉舁亭

冊前

寶後黃蓋一柄御仗二對前導由中路出正副使隨後
行內大臣侍衛於

午門內金水橋兩旁王以下奉恩將軍以上於

西華門內滿漢四品以上官於

西華門外按翼序立

冊寶亭至皆跪候過隨行

冊寶亭出德勝門至鞏華城進南門正副使執事官咸

於門外下馬隨祭內大臣侍衛滿漢四品以上

官於鞏華城皇城外排跪奉迎采亭由中門入

至二門止禮部官豫奉絹

冊寶設於各案正副使詣亭前行一跪三叩禮奉香

冊香

寶由中路至

几筵殿內設於各案

冊左

寶右行一跪三叩禮正副使詣香案前贊引官贊上香

正使上香贊宣

冊宣冊官奉

冊立宣訖贊宣

寶宣寶官奉

寶立宣訖仍陳於各案上正使奉香

冊副使奉香

寶陳設於

几筵前

冊左

寶右行一跪三叩禮由左門退出鴻臚寺官引內大臣

侍衛滿漢四品以上官至階下兩翼序立隨承
祭官致祭上香奠帛讀祝三獻爵行禮如儀恭

奉祝文絹

冊寶送燎所禮成正副使復

命翼日

頒詔天下○七月初一日孟秋時饗

太廟遣官行禮分獻執事各官咸朝服○初三日

聖祖仁皇帝親至鞏華城行月祭禮祭酒舉哀

以後月祭皆

親臨

○十五日行中元致祭禮儀駕全設陳金銀定十萬楮錢七萬畫段萬端楮帛二萬端饌筵二十一席羊九酒九尊王以下奉恩將軍以上民公侯伯以下三品官以上公主福晉以下鎮國將軍夫人以上民公侯伯大臣命婦咸齊集讀文祭酒行禮如儀○八月十二日

聖祖仁皇帝至鞏華城駐蹕翼日行百日致祭禮儀駕全設陳金銀定五萬楮錢四萬五千楮帛二萬

饌筵二十五席羊九酒十有三尊王以下奉恩
將軍以上民公侯伯以下男以上齊集致祭自
百日後至期年每日仍三次奠獻期年外日一
次奠獻三年後朔望獻酒果○十三日朝鮮國
王遣官進香致祭儀駕全設王以下奉恩將軍
以上民公侯伯以下滿漢四品官以上齊集朝
鮮使臣於右翼末立陳設祭品上香鳴贊官贊
使臣於仗南行三跪九叩禮畢退立原班讀文

遣官一人祭酒三爵王以下各官皆跪引朝鮮
使臣至拜位跪隨行三叩禮舉哀興復贊行二
跪六叩禮畢徹饌焚祭文各退○歲暮致祭儀
駕全設陳金銀定五萬楮錢楮帛各五萬饌筵
三十一席羊九酒十有五尊民公侯伯以下四
品官以上公主福晉以下大臣命婦以上咸齊
集讀文祭酒行禮○十四年正月行題

主禮大學士一人詣沙河於奉安并拊

奉先殿神主前點香燭一跪三叩恭奉

神主禮部官前導至黃案前奉安案上點香燭一跪三叩滿漢大學士各一人朝服盥手詣香案前行一跪三叩禮畢敬點

神主復行三叩禮大學士一人詣黃案前一跪三叩恭奉

神主奉安鳳輿內一跪三叩興校尉舁輿儀駕全設出輦華城南門至

東華門儀駕止御仗黃蓋前導至

奉先殿誠肅門外止王以下文武各官咸於

東華門外齊集跪候過各退禮部太常官十人導

引內閣大臣隨輿至

城肅門是日升祔

奉先殿奉安行禮致祭

詳見掌儀司

○清明日不焚楮帛進

挂楮錢寶花一座

卽佛朶

於

几筵殿內左旁是日因

皇太子出痘照

陵寢四時大祭例遣官讀祝奠帛三獻行禮儀駕全設
覺羅民公侯伯以下三品官以上齊集素服陪
祭停止舉哀○期年致祭儀駕全設陳金銀定
五萬楮錢楮帛各五萬饌筵三十一席羊九酒
十有五尊王以下奉恩將軍以上民公侯伯以
下滿漢四品官以上公主福晉以下大臣命婦
以上咸齊集讀文祭酒行禮○期年後每日奠

獻如常儀每滿月致祭陳金銀定五千楮錢五千饌筵五席羊三酒三尊○再期致祭陳金銀定三萬楮帛楮錢各萬饌筵十有一席羊三酒一尊王以下奉恩將軍以上民公侯伯以下三品官以上公主福晉以下大臣命婦以上咸齊集讀文祭酒行禮如期年儀○清明日齊集致祭如再周儀不讀文○七月十五日行中元致祭禮王以下輔國將軍以上民公侯伯以下男

以上公主福晉以下子一品夫人以上齊集讀
文祭酒行禮○歲暮日直饗

太廟王以下公以上皆免齊集鎮國將軍以下四品官
以上一半齊集公主福晉以下大臣夫人以上
咸齊集讀文祭酒行禮○三周年後每月朔望
聖節忌辰十月朔並清明中元冬至歲暮四大祭及遇
慶典照常致祭均照

陵寢致祭例遣官朝服行禮○二十年三月奉移

梓宮與

孝昭仁皇后同日安葬

一應禮儀
詳見於後

孝昭仁皇后喪儀康熙十七年二月二十六日

孝昭皇后崩奉安

梓宮於

宮中正殿設

几筵建丹旒於

宮門外之右

聖祖仁皇帝輟朝成服

妃

嬪以下宮人

皇太子諸皇子皆成服諸王以下文武官員公主
福晉以下八旗二品夫人以上咸齊集舉哀持
服二十七日凡守

堂子官吏祭

神殿執事官員內監

壇

廟

奉先殿官員內監

陵寢官員內監出征將軍以下兵丁以上妻子漢官命婦皆停給孝服本家見有出痘及父母新喪人等暫停給孝服以軍興免直隸各省文武官齊集舉哀制服及遣官進香

梓宮前一應陳設行禮致祭皆與

仁孝皇后同惟衍聖公五經博士在京亦給孝服一例
齊集○二十八日奉移

梓宮於

武英殿是日儀駕全設奉移時內大臣侍衛於

景運門內西嚮序立王以下各官於

西華門內東嚮序立候

梓宮至皆跪舉哀候過興公主福晉以下大臣命婦以

上先至

武英殿門內兩廡階下按翼序立候

梓宮至跪舉哀候過興奉安畢祭酒三爵各退是日

聖祖仁皇帝親臨

二十九日三十日
皆親臨

諸王以下文武各

官每日早晚兩次集

武英殿門外隨行禮舉哀○是日題準春分日原

定

親詣

日壇行禮今請停進齋戒牌銅入改遣官行禮祀日

用樂承祭執事各官咸朝服百官免陪祀○三

月初二日奉

旨擬上

大行皇后諡號遵

旨議準

冊諡典禮應照康熙十三年遣使

冊諡禮交各該衙門照例辦理敬謹舉行○初六日祭
帝王廟承祭分獻執事各官咸朝服用樂漢官陪祀

滿官不陪祀○初七日行殷奠禮

聖祖仁皇帝親臨陳設禮儀與

仁孝皇后殷奠禮同○十三日清明遣官致祭不焚楮
帛豫日進挂楮錢寶花一座至日儀駕全設陳
羊酒祭筵如數王以下文武各官公主福晉以
下男夫人以上咸齊集祭酒三爵每祭一叩舉
哀畢各退○十五日行初祭禮與

仁孝皇后初祭禮同是日

聖祖仁皇帝妃嬪除服○次日繹祭陳設禮儀與祭
仁孝皇后禮同○二十五日奉移

梓宮於沙河輦華城前期行啟奠禮並遣大臣於

仁孝皇后几筵前祭告至日奉移齊集行禮

靈駕啟行往輦華城皆與

仁孝皇后同安於

殯殿左間

聖祖仁皇帝親臨送王公滿漢文武大小官員咸齊集

西安門外舉哀跪送其往送王公大臣官員等

至輦華城奉安畢舉哀行禮是日

聖祖仁皇帝駐蹕輦華城○二十六日行大祭禮

聖祖仁皇帝親臨陳設禮儀與

仁孝皇后大祭禮同諸王以下文武官員咸齊集舉哀

祭畢

皇太子諸皇子除服衆皆除服○次日繹祭齊集

行禮○二十八日行滿月致祭禮齊集舉哀如

儀以後月祭同○閏三月初九日行

冊諡禮

聖祖仁皇帝素服御太和門

閱冊寶遣官詣鞏華城

冊諡

大行皇后曰

孝昭皇后儀與冊諡

仁孝皇后禮同○四月初一日孟夏時饗

太廟遣官行禮朝服作樂○五月初三日大祭

方澤遣官行禮朝服作樂○初七日行百日致祭禮

聖祖仁皇帝親臨陳設禮儀與十三年

仁孝皇后百日致祭禮同百日後期年內仍每日奠獻
三次期年外日奠獻一次三年後朔望獻酒果
○七月十五日行中元致祭禮如儀○歲暮因
皇太子出痘照

陵寢例遣官素服行禮讀祝奠獻行禮仍陳設儀駕不
焚楮帛停舉哀○十八年正月因歲暮未行大
祭特舉大祭如儀○期年致祭及期年以後月

祭清明中元歲暮再期之祭將葬先期行題主

禮均如

仁孝皇后儀○二十年二月

陵寢地宮成於十七日以奉移

仁孝皇后

孝昭皇后梓宮行啟奠禮儀駕各全設陳金銀定各五

萬楮錢各五萬楮帛各五萬饌筵各三十一席

羊各九酒各十有五尊祭文各一道遣

皇子致祭讀文祭酒行禮王以下四品官以上公
主福晉以下大臣命婦以上齊集皆隨行禮祭
畢讀祝官奉祭文送燎所各退○十九日奉移

仁孝皇后

孝昭皇后梓宮於

陵寢設

仁孝皇后儀駕於左

孝昭皇后儀駕於右

冊寶各陳鳳輿內前行昇大昇輦校尉民夫各一百二

十八人

首班末班用校尉
餘用近畿民夫

每日分六十班每班

備四人計夫役七千九百二十人直隸巡撫

今改

總督

率司道府州縣各官會同在京三品堂官以

下科道主事以上八旗遴選公侯伯以下雲騎

尉以上及前鋒叅領護軍叅領上三旗一等侍

衛下五旗王府長史散騎郎一等護衛等官每

班各四人更番管束工部夫頭四人豫備四人

分爲兩班輪司響尺鑾儀衛官節示進退

後仿此

屆時祭酒三爵

聖祖仁皇帝親臨送內大臣侍衛於沙河鞏華城外王
以下奉恩將軍以上於西竇家莊西覺羅民公
侯伯以下滿漢各官於西竇家莊東齊集公主
福晉以下奉恩將軍恭人以上民公侯伯一品
夫人以下男夫人以上於東竇家莊東齊集侯
靈駕至王以下各官公主福晉以下大臣命婦等按翼

序跪舉哀候過各退往送之王以下各官及內
大臣侍衛按旗乘馬隨行過門橋祭酒至宿次
奉安

靈駕於

蘆殿內奠獻祭酒三爵王以下各官排班行禮舉哀
各退每早起行時祭酒三爵所過地方五十里
內文武官員於道右百步外跪迎至宿次於網
城外行三跪九叩禮奠獻時在旗末隨舉哀行

禮次早於道右排跪舉哀候過二十六日至
陵時暫奉安

蘆殿內祭酒三爵王以下各官隨行禮舉哀各退每
日照常奠獻祭酒○大葬前期三日遣官各一
人祇告

天

地

太廟

社稷是日遣官祇告

孝陵后土

昌瑞山之神○三月初八日奉移

梓宮安葬地宮前期一日行遷奠禮讀文祭酒致祭是日儀駕全設陳金銀定各三萬楮錢楮帛各三萬饌筵各二十五席羊各七酒各十有五尊王以下各官咸齊集祭酒行禮舉哀奉移

梓宮王以下各官在圍棚外按翼排跪舉哀候過隨後

步行奉安

梓宮於方城前蘆殿內升龍輜奠饌筵祭酒三爵王以下各官隨行禮舉哀畢各退是日儀駕焚訖至日

聖祖仁皇帝親臨王以下滿漢大臣齊集屆吉時祭酒三爵奉移龍輜由隧道入地宮奉安寶牀

仁孝皇后梓宮在左

孝昭皇后梓宮在右香

冊寶均照左右奉安奉安時

皇后嫔戚大臣及內務府禮部工部堂官

欽命者得入奉安畢掩閉

元宮於方城前祭酒三爵齊集王公百官皆舉哀隨行

禮畢卒哭各退○是日遣官詣

孝陵致祭並祭

后土

昌瑞山之神彼時饗殿尚未告成於

寶頂方城前平臺上蓋造

蘆殿自四月朔日起四時各大祭每月朔望十月朔
忌辰皆照沙河例致祭

欽定四庫全書

欽定四庫全書
卷八十八

孝懿仁皇后喪儀康熙二十八年七月初十日

孝懿皇后崩○前初八日

諭朕欽奉

皇太后諭旨皇貴妃佟佳氏孝敬性成淑儀素著鞠育
皇子備極恩勤今忽爾遘疾勢在瀕危予心深爲軫
惜應卽立爲皇后以示崇褒欽此前者九卿諸臣屢
以冊立中宮上請朕遷延未許今祇遵

慈諭立皇貴妃佟佳氏爲皇后應行典禮該部卽議以

聞初九日行

冊立禮布告中外至初十日

皇后崩奉安

梓宮於

承乾宮正殿設

几筵建丹旒於

宮門外之右

聖祖仁皇帝輟朝成服

妃

嬪宮人

皇太子皇子皆成服○是日爲始陳設儀駕王公
內大臣侍衛大學士上三旗都統副都統等一
日三次齊集舉哀滿漢文武官員一日二次齊
集舉哀公主福晉以下八旗大臣命婦官員等
之妻以上一日一次齊集舉哀咸服白布服於
朝夕奠時隨行禮官員等持服二十七日凡守

堂子官吏祭

神殿執事官員男婦內監

壇

廟

奉先殿官員內監

陵寢官員內監出征將軍以下兵丁以上妻子漢官命

婦皆停給孝服本家見有出痘及父母新喪人

等暫停給孝服移文直省督撫提鎮及文武官

免其制服舉哀遣官進香○十三日行奉移禮
儀駕全設王以下入八分公以上於

東華門內內大臣侍衛大學士學士等於

東華門外左翼民公侯伯以下有頂帶官員以上
於紅廟大路口右翼民公侯伯以下有頂帶官
員以上於鎧市口各齊集候

靈駕至舉哀跪迎

聖祖仁皇帝親臨送至

朝陽門外奉安於

殯宮隨送

靈駕之王以下官員於

殯宮牆外公主福晉以下豫至二門外舉哀跪迎奉安
於

殯宮畢奠獻行禮衆隨行禮舉哀○十五日行殷奠禮
陳羊酒饌筵楮帛如數

聖祖仁皇帝親臨祭酒讀文行禮諸王以下官員以上

公主福晉以下大臣命婦以上齊集舉哀是日
奉

旨擬上

大行皇后諡號遵

旨議準

冊諡典禮應照康熙十七年遣使

冊諡禮交各該衙門照例辦理敬謹舉行 十八日

聖祖仁皇帝詣

欽定四庫全書

欽定大清會典則例
卷八十八

殯宮祭酒舉哀畢卽

駐蹕朝陽門外○二十一日行初祭禮陳羊酒饌筵楮帛如數王以下官員福晉以下命婦照常齊集親祭酒讀文致祭衆隨行禮舉哀是日

聖祖仁皇帝妃嬪除服○二十二日繹祭陳設齊集如儀○八月初七日

聖祖仁皇帝親臨行大祭禮讀文致祭王以下官員福晉以下命婦咸齊集陳設禮儀與初祭同祭畢

皇太子諸皇子除服衆皆除服○初八日繹祭

聖祖仁皇帝親臨祭酒禮儀與初祭次日繹祭同○初

九日行月祭禮陳羊酒饌筵楮帛如數齊集行
禮如常儀○是月初四日祭

文廟初五日祭

社稷壇改期於十四日十五日致祭初十夕

月二十八日饗

帝王廟咸朝服行禮○九月十三日行月祭禮儀與

前月祭同○二十二日

命親王恭齋

冊寶詣

殯宮行禮

諡

大行皇后曰

孝懿皇后儀與十七年冊諡禮同○十月初一日孟冬

朔時饗

太廟遣官朝服行禮○初五日行月祭禮儀與前月祭同○初七日行百日致祭禮

聖祖仁皇帝親臨陳羊酒饌筵楮帛如數讀文致祭如儀自百日後至期年仍每日三次奠獻期年外日一次奠獻三年後朔望獻酒果○初九日以奉移

梓宮往山陵行啓奠禮

聖祖仁皇帝親臨舉哀陳羊酒饌筵楮帛如數讀文致

祭儀與殷奠同○是月以大葬屆期行題主禮

升祔

奉先殿儀與

孝昭皇后題主禮同○十一日奉移

孝懿皇后梓宮於

陵寢儀駕全設王以下奉恩將軍以上民公侯伯以下

滿漢官員以上公主福晉以下奉恩將軍恭人

以上民公侯伯夫人以下男夫人以上咸按翼

齊集舉哀

聖祖仁皇帝親臨送祭酒行禮舉哀畢

靈駕發不隨送王以下各官於跪送後各退隨送王以下各官按旗乘馬隨行所過門橋遣內大臣祭酒至宿次奉安

梓宮於蘆殿陳設

冊寶於左右行夕奠禮祭酒王以下各官排班行禮舉哀次早奠獻畢啟行沿塗五十里內文武官員

照例跪迎於旗末排班行禮○十七日

聖祖仁皇帝先詣

暫安奉殿

孝陵行禮祭酒舉哀次至

皇后陵寢祭酒舉哀是日

聖駕駐蹕陵左○十九日行奉移禮陳羊酒饌筵楮帛

如數遣

皇子讀文致祭是日

聖駕駐蹕行宮○二十日行大葬禮

聖祖仁皇帝親奠獻視安葬畢

聖駕駐蹕溫泉○三十日

聖祖仁皇帝至

暫安奉殿

孝陵祭酒舉哀仍至

皇后陵寢祭酒舉哀畢

聖駕還京○嗣後清明中元冬至歲暮四大祭及朔望

聖節忌辰致祭行禮與

仁孝皇后

孝昭皇后同

孝敬憲皇后大喪儀雍正九年九月二十九日

孝敬皇后崩奉

梓宮於

暢春園正殿設

几筵建丹旒於

內門外之右

世宗憲皇帝成服縞素

十三日

妃嬪

皇子福晉咸成服

簡命王公大臣辦理喪儀是日和碩親王以下奉恩將軍以上民公侯伯以下有頂帶官員以上公主福晉以下縣君奉恩將軍恭人以上民公侯伯一品夫人以下侍郎男夫人以上

孝敬皇后嫡戚男女皆成服內府三旗佐領護軍領催等妻及內管領下執事男婦咸成服革職宗室覺羅官亦令成服

孝敬皇后之宮女內監等均令截髮辮剪髮成服凡二
十七日而除王以下各官不嫁娶不作樂凡二
十七日民間七日凡守

堂子官吏祭

神殿執事官員內監

壇

廟

奉先殿官員內監

陵寢官員內監出征將軍以下兵丁以上妻子漢官命婦皆停給孝服本家見有出痘及父母新喪人等暫停給孝服移文直省督撫提鎮免其制服舉哀遣官進香○外藩額駙王公台吉等公主福晉郡主等有在服內來京者亦準其成服朝鮮國使臣於服內來京者照例給孝服不必齊集○每日三次奠獻皆

皇子祭酒行禮朝奠夕奠設儀駕於

暢春園大門外公主福晉以下奉恩將軍恭人以
上民公侯伯一品夫人以下侍郎男夫人以上
於

暢春園大門內兩旁分班齊集內府官員護軍領
催等妻於

几筵殿階下兩旁齊集親王以下奉恩將軍以上民公
侯伯以下有頂帶官員以上及內府官員護軍
領催等皆於

暢春園大門外兩旁齊集各於齊集處舉哀祭酒
時隨行禮每日二次齊集凡三日止至第四日
王以下各官每日早齊集一次○十月初一日

孟冬時饗

太廟遣官素服行禮樂設而不作○初六日以奉移

梓宮行啟奠禮是日儀駕全設王以下有頂帶官員以
上公主福晉以下大臣官員命婦以上咸齊集
讀文致祭承祭官祭酒三爵行禮舉哀衆隨行

禮舉哀如儀○初七日奉移

梓宮於田村是日儀駕全設陳

冊寶於采亭王以下奉恩將軍以上內大臣侍衛等暨
皇后嫔戚內府官員咸於

暢春園大門外按翼齊集民公侯伯以下有頂帶
官員以上於萬泉莊寬濶處齊集漢大臣官員
等均豫往田村

殯宮大門外齊集公主近支福晉等豫於

殯殿後福晉以下及成服命婦內府佐領內管領下官員護軍領催等妻於二門外分翼齊集奉移時皇子祭酒三爵行禮舉哀衆隨行禮舉哀

靈駕發

皇子於左側徒行奏派近

靈駕行走之王公及嫔戚等皆於兩旁隨行內府婦女一百二十人乘馬以次隨行凡

靈駕所經之處齊集官咸跪舉哀所過門橋遣內大臣

祭酒

靈駕至田村奉安

梓宮於殯殿設

几筵

皇子祭酒三爵衆隨行禮畢各退○十一日行初
祭禮儀駕全設陳羊酒饌筵楮帛如數親王以
下奉恩將軍以上民公侯伯以下侍郎男以上
公主福晉以下奉恩將軍恭人以上民公侯伯

一品夫人以下副都統侍郎男夫人以上咸齊
集讀文祭酒行禮舉哀等儀與前奉移祇告禮
同是日

世宗憲皇帝除服

妃嬪等咸除服○次日繹祭禮部工部內務府堂
官及內府男婦齊集奠獻內務府總管夫人祭
酒衆隨行禮如儀○是日奉

旨公主福晉郡主及大臣命婦釋服以後天氣寒冷凡

於祭日不必齊集○自是日始

梓宮照例漆飾四十九次○二十三日行大祭禮陳設
禮儀與初祭同祭畢

皇子皇子福晉除服衆皆除服○次日繹祭陳設
禮儀與初祭次日繹祭同○二十七日行周月
致祭禮陳設羊酒饌筵楮帛如數親王以下侍
郎男以上咸齊集祭酒行禮如儀百日内凡月
祭儀同百日外月祭止内府佐領内管領下官

員男婦齊集○十一月初五日行冬至致祭禮
陳羊酒饌筵楮帛如數王以下三品官以上咸
齊集祭酒行禮○十二月初十日諡

大行皇后曰

孝敬皇后前期遣官祇告

天

地

太廟後殿

奉先殿

社稷屆期遣正副使齋

冊寶詣田村行冊諡禮儀與康熙十三年同次日

頒詔天下○二十五日行百日致祭禮陳羊酒饌筵楮

帛如數親王以下三品官以上咸齊集讀文致

祭

皇子祭酒行禮如儀自百日後至期年日仍三次

奠獻期年外日一次奠獻三年後惟朔望獻酒

果○二十八日行歲暮致祭禮陳羊酒饌筵楮
帛如數親王以下奉恩將軍以上民公侯伯以
下有頂帶官員以上因直齋戒照例一半齊集
讀文祭酒行禮如儀○十年三月初十日行清
明致祭禮不焚楮帛進掛楮錢寶花一座陳羊
酒饌筵如數王以下三品官以上齊集讀文祭
酒行禮儀與冬至同○七月十五日行中元致
祭禮陳羊酒饌筵楮帛如數王以下三品官以

上齊集讀文祭酒行禮儀與歲暮同○九月二十九日適直孟冬時饗齋戒之期於前二十五日行期年致祭禮陳羊酒饌筵楮帛如數王以下三品官以上齊集讀文祭酒行禮○十一年九月行再期致祭禮陳羊酒饌筵楮帛如數王以下三品官以上齊集讀文祭酒行禮儀與期年同三年致祭儀同三年內清明中元冬至歲暮各祭儀均與期年內禮同三年後四時大祭

朔望上香行禮皆與

孝誠仁皇后沙河殯宮禮同惟承祭執事官改用補服

○十三年十一月恭上

孝敬憲皇后尊諡○乾隆元年二月奉移

孝敬憲皇后梓宮合葬

泰陵一應禮儀詳載

世宗憲皇帝大喪儀

孝賢皇后喪儀乾隆十三年三月十一日

孝賢皇后崩十二日

諭皇后同朕奉

皇太后東巡諸禮已畢忽在濟南微感寒疾將息數天
已覺漸愈誠恐久駐勞衆重塵

聖母之念勸朕回鑾朕以膚疴已痊塗次亦可將息因
命車駕還京今至德州小程忽遭變故言念大行
皇后乃

皇考恩命作配朕躬二十二年以來誠敬

皇考孝奉

聖母事朕盡禮待下極仁此亦宮中府中所盡知者今
在舟行值此事故永失內佐痛何忍言昔古帝王
尚有因巡方而殂落在外者況皇后隨朕事

聖母膝下仙逝於此亦所愉快一應典禮至京舉行布
告天下咸使聞知欽此○十六日恭奉

孝賢皇后靈駕由

蘆殿入京是日儀駕全設王以下三品官以上於

蘆殿門外齊集

皇子詣前祭酒三爵衆皆隨行禮

靈駕發

皇子於左旁隨行

皇后嫔戚近輦隨行次稍間

妃嬪宮人車隨行又次稍間豹尾班隨行所過門

橋遣內大臣祭酒

靈駕至京四品以下官豫於

朝陽門外齊集公主近支王福晉等於

儲秀宮兩旁齊集諸王福晉夫人縣君鄉君嫔戚

命婦婦女咸於

東華門內橋西齊集大臣官員命婦及內府佐領

內管領下婦女於

東華門內齊集咸喪服跪迎

靈駕由

東華門入自

寧壽宮西行入

蒼震門至

長春宮奉安於正殿設

几筵建丹旒於宮門外之右王以下二品官以上於

內左門

內右門外按翼齊集三品官以下於

景運門外齊集

皇帝親臨視安奉

梓宮畢

皇子祭酒三爵衆隨行禮畢各退是日

簡命王公大臣恭理喪儀○又奏準

皇帝成服應用素紬孝服

妃嬪以下

皇子皇子福晉咸用白布孝服

皇子截髮辮

皇子福晉剪髮○又奏準

皇帝九日不辦事王以下宗室以上滿漢文武有頂帶官員停止嫁娶作樂二十七日軍民七日男摘冠纓女去耳飾王以下有頂帶官員以上百日致祭後剃頭親王以下奉恩將軍以上民公侯伯以下有頂帶官員以上公主福晉以下鄉君奉恩將軍恭人以上民公侯伯一品夫人以下侍郎男夫人以上

皇后嫔戚男婦內府三旗佐領內管領下官員護軍
領催等之妻內管領下

几筵前執事男婦咸令成服革職宗室覺羅等亦令
成服外藩額駙王公台吉公主福晉郡主等於
服內來京者亦令其成服

皇后宮中侍女內監等令其剪髮截髮辮凡守

堂子官吏祭

神殿執事官員男婦內監

壇

廟

奉先殿官員內監

陵寢官員內監出征將軍以下兵丁以上妻子漢官命

婦皆停給孝服行文軍前不摘冠纓本家見有

出痘及父母新喪人等暫停給孝服朝鮮國人

員於服內來京者亦令成服不必齊集每日三

次奠獻

皇子祭酒朝夕奠陳儀駕於

景運門外近支福晉公主郡主嫔戚內之近支婦女於

長春宮內齊集諸王公福晉以下鄉君奉恩將軍
恭人以上民公侯伯一品夫人以下侍郎男夫
人以上於

長春宮西門外按次齊集內府佐領內管領下官
員護軍領催等妻在福晉等後齊集親王以下

二品大臣以上於

長春宮外角門外

中正殿二門外齊集舉哀齊集之王以下有頂帶
官員以上早晚二次進前舉哀王公大臣等十
三日內朝晡二次奠獻齊集舉哀十三日後每
朝奠齊集一次二十七日後停止遇祭仍齊集
公主福晉以下男夫人以上三日每日二次齊
集第四日朝奠時齊集初祭後停止遇祭仍齊

集內府佐領內管領下官員護軍領催等之妻
三日內每日朝夕奠二次齊集舉哀三日後日
以一旗輪流齊集○又奏準

几筵前每日晨朝奠晡時夕奠日中午奠○自齊集
日爲始王公各於該府第齋宿部院堂司官於
各該部院旗下都統叅佐領及散秩官於本旗
衙門齋宿凡二十七日○十九日奏準按會典
內載

孝誠仁皇后喪儀經禮部題準移文直省免其齊集舉
哀制服遣官進香蓋緣康熙十三年時值三藩
叛逆大兵致討恐在外各衙門舉哀制服有感
觀聽是以禮部題明免直省官民治喪原屬一
時權宜嗣後相沿遂未更正考之周禮爲王后
服齊衰注言諸侯諸臣皆齊衰是內外臣無異
也明會典載皇后喪儀十三布政使司及直隸
禮部請勅差官訃告在外文武官員軍民人等

制服與京師同今

大行皇后正位中宮母儀天下忽值崩逝正四海同
哀之日見已欽奉

諭旨布告中外應俟在京王公百官成服之日將欽
奉

諭旨謄黃遣官頒下直省令在外文武各官於奉到
諭旨爲始摘冠纓齊集公所哭臨三日持服通前二
十七日而除三日後照常辦事二十七日內文

武各官不嫁娶不作樂軍民人等摘冠纓七日
七日內不嫁娶不作樂其見在出征官軍悉免
舉哀制服督撫以下仍照舊例免其遣官進香
○又奏準禮稱父在杖不上於堂

母后至貴不得不屈於所尊謹擬在京王公百官咸
縞素二十七日百日剃頭百日內有應行典禮
及朝會坐班咸用禮服吉服入朝奏事皆素服
冠綴纓緯百日外入朝奏事用常服二十七月

以內遇

几筵致祭齊集仍素服去冠纓緯

皇子等制服遵

旨照百日喪服二十七月內素服詣

几筵前喪服行禮○二十二日

諭禮部

大行皇后諡爲

孝賢皇后所有應行典禮照例奏聞欽此遵

旨議準

冊諡典禮悉遵康熙十三年遣使上

孝誠皇后尊諡禮舉行○二十三日以奉移

梓宮行啟奠禮是日儀駕全設陳冠服設祭品於

几筵前列饌筵於

長春宮露臺兩旁陳楮帛於

景運門外箭亭之南所陳羊酒饌筵楮帛如數王

以下有頂帶官員以上公主福晉以下二品官

命婦以上咸齊集行禮舉哀皆如儀禮部堂官
一人奉祭文二人前引由

乾清門西門入至

長春宮陳祭文於左檐下黃案是日

皇帝親臨上食畢讀祭文時

皇子衆皆跪哀暫止讀祭文畢

皇帝旁坐祭酒三爵每祭

皇子衆行一叩禮舉哀徹祭案畢王以下各退禮

部堂官引讀祝官恭奉祭文由

乾清門西門出至燎所付內監退內務府總管夫
人內管領妻等恭奉冠服送燎所

欽命之王福晉祭酒三爵衆隨行禮舉哀各退○是
日奏準恭奉

孝賢皇后冠服送燎時齊集婦女若皆隨往自
長春宮至

乾清門

宮內路徑人多難行應令奏遣之福晉及內府婦
女百人隨冠服後行其餘福晉以下咸令於

乾清門外西旁齊集冠服至跪候過隨行○二十

五日奉移

梓宮於景山觀德殿是日儀駕全設陳丹旒於

景運門外設

冊寶於采亭至時

皇帝親臨祭酒三爵奉移

梓宮由

乾清門西門出王公及直班內大臣侍衛於

乾清門前按翼列跪舉哀

梓宮至

景運門外登大昇輦

皇子於左旁隨行奏遣近

靈駕行之王公及嫺戚等各按翼行內府婦女一百

八十人於

東華門外乘馬隨行次稍間豹尾班隨行次稍間
王公內大臣侍衛隨行所過門橋遣內大臣祭
酒左翼大小官員於

東華門外右旁齊集漢官在滿官之次齊集右翼
大小官員於沙灘齊集均族

靈駕至跪迎舉哀候過隨行

靈駕將至親王以下三品官以上於

觀德殿大門外齊集四品以下官及內府官員護

軍領催等於景山東門外齊集公主近支福晉等及姻戚近支婦女豫由景山後牆門入於殿後兩旁齊集諸王福晉以下一品夫人以上豫於

觀德殿二門內齊集二品夫人以下及內府佐領官員護軍領催等之妻於二門外齊集均族梓宮至跪迎舉哀奉安

梓宮於

觀德殿設

几筵陳儀駕於大門外設

冊寶於

几筵左右

皇子祭酒三爵齊集王以下官員以上公主福晉
以下官員妻以上皆隨行禮舉哀畢各退○是
日以

大行皇后崩逝照例將

勅諭由禮部謄黃頒發直省遣官齎

勅諭訃聞於朝鮮國其內扎薩克衆喀爾喀作六路遣官送往哈密青海等處作二路遣官送往○

二十九日

皇帝親臨行初祭禮儀駕全設陳羊酒饌筵楮帛如數親王以下有頂帶官員以上公主福晉以下二品夫人以上齊集行禮舉哀如儀是日祭畢皇帝除服

命妃嬪宮人於二十七日除服○次日繹祭陳羊酒
饌筵楮帛如數內務府禮工二部堂官辦理喪
儀大臣嫔戚內府佐領內管領下男婦咸齊集
致祭行禮如儀○四月初一日孟夏時饗

太廟照雍正九年之例承祭分獻執事各官均照常齋
戒素服致祭齋戒日不至齊集處舉哀○是日
奏準

梓宮照例於本月初七日起漆飾四十九次○初九

日行大祭禮

皇帝親臨祭酒陳設禮儀與初祭同是日

妃嬪宮人皆除服衆皆除服○次日繹祭陳設禮

儀與初祭次日繹祭同○十一日行周月致祭

禮陳羊酒饌筵楮帛如數王以下有頂帶官員

以上公主福晉以下二品夫人以上咸齊集祭

酒行禮舉哀如前儀

凡月祭儀同

○二十七日

常雩遣官行禮分獻執事各官咸朝服○五月二十一

日

冊諡

大行皇后曰

孝賢皇后前期遣官一人祇告

太廟後殿

奉先殿至日

皇帝素服御太和門遣親王郡王爲正副使齋

冊寶詣

觀德殿行

冊諡禮儀與康熙十三年同禮成正副使復

命次日

頒詔天下○又奏準是日

皇子喪服隨班行禮○二十三日奏準帝后雖云
儷體而地道臣道天澤昭然升殿視朝事關典
制非燕樂可比

孝賢皇后喪制應遵用

國朝

祖制百日後

皇帝陞殿文武各官及外藩使臣行禮羣臣朝服均

如常儀其作樂之處並照常舉行

皇帝兩月除沐後卽應

御門聽政羣臣常服不挂數珠禮畢仍素服百日後

如值

御門之期羣臣常服挂數珠庶於禮制分義皆爲允

協再恭檢

孝誠仁皇后喪儀案卷內載百日以後期年以內王公
以下各官逢初五十五二十五等日咸朝服月
朔初十二十等日補服皆挂數珠馬懸繁纓尋
常入內奏事常服不挂數珠馬不懸繁纓等語
今

孝賢皇后百日以後期年以前上朝坐班及入內奏
事應悉遵此制至一切典禮應朝服采服之日

仍如常儀所有原議入朝奏事用常服之處應
通行改正本日奉

諭孝賢皇后大事一切典禮朕皆斟酌古今務協其
宜蓋皇后坤寧正位體制原尊然以天子之禮視
之則節文亦自有別縱令伉儷恩篤亦不可事事
從而加厚以致失之太過卽或情誼稍有未洽亦
不宜事事從而貶抑以致失之不及蓋皇后自有
皇后之體制不可以夫妻之私情爲之增損於其

間也朕於孝賢皇后情誼隆重固天下臣民所共
知而經紀喪儀從不肯以一毫私意稍紊典常考
明代嘉靖七年孝潔陳皇后之喪閣臣張璁援據
古禮以爲喪服自期以下諸侯絕特爲旁期言若
妻喪本自三年報殺爲期年固未嘗絕上宜爲后
服期等語其折衷頗爲允當今據大學士等議奏
禮儀內如陞殿作樂一節凡屬大朝祀典自當照
例朕意今年內尋常陞殿但鳴鐘鼓樂懸而不作

庶爲合宜至來年正月將屆期年一切典禮著照
康熙十四年之例如常儀餘依議欽此○六月十

三日

諭山東沂州營都司姜興漢奉天錦州府知府金文
淳皆於孝賢皇后百日內剃頭經巡撫及副都統
叅奏已降旨交刑部問罪本朝定制遇有國恤百
日以内皆不剃頭倘違例私犯

祖制立即處斬亦如進關時令漢人薙髮彼不薙髮者

無不處斬之理此百餘年人所共遵不待傳諭而後曉是以會典律例皆無明文蓋以修會典時不過增損明季之舊章明朝原無此制也又以其事本理法所必當然不必載之簡冊卽如子孫孝養父母當食進食當衣加衣豈待專立科條然後盡其子職亦豈得以律令不載遂爲不孝者解免至謂漢人遂可不遵百日之制苟有此心卽與不肯雉髮者同尤不容誅也伊等身爲臣子豈有不遵

國朝定制之理若謂出於不知豈不見他人尚未
剃頭何以不推求其故安心違犯此卽立行正法
以彰憲典亦無可恕然自朕思之律例會典實無
明文而部文究未傳諭其所以未經聲明者亦因
其爲衆所共知今既顯明正其違犯之罪又當曲
體其愚昧犯法之情且或遠方僻陋拘於二十七
日除服之文遂有陷於不知或見他人有剃頭者
卽謂事屬可行冒昧觸網此等情節又不得不格

外矜原更恐外省見有此兩案諭旨慮蹈徇隱之
愆紛紛叅奏國家亦無此體制可傳諭各督撫提
鎮學政欽差各官等此旨未到之前或見在已經
察出之案自當叅處不容廢法姑縱其餘未發覺
者槩不必再行飭叅旗人本屬當知若有喪心之
徒不在此寬免之例嗣後將國恤百日內不得剃
頭違者立即處斬之處載入會典律例令人共知
遵守朕惟率由

祖制欲使法在必行並無從寬從嚴之見存乎其間欽此○二十一日行百日致祭禮陳冠服設儀駕陳羊酒饌筵楮帛如數王以下有頂帶官員以上公主福晉以下二品夫人以上咸齊集

皇帝親臨祭酒儀與初祭同

是月十二日小暑適值禁火照常陳冠服祭酒

畢仍徹回留至中元焚化○七月初十日

諭今日見江寧協領員闕保送之佐領尚未剃頭蓋伊等以旨到計日矣皇后大事滿百日剃頭皆當

以事出之日爲始若以旨到日計之則極遠省分
益致遲久不齊從前會典未載入此條而禮部行
文時並未明白指示以致外省人員非失之不及
則轉至矜持至於太過將此通行曉諭各省駐防
處如有似此觀望未剃頭者皆令剃頭纂修會典
時詳悉載入欽此○十五日行中元致祭禮設儀
駕陳羊酒饌筵楮帛如數齊集讀文行禮與初
祭同○二十九日奏準八月十三日此一日

觀德殿三次奠獻如常內外照例停止舉哀○八月初七日朝鮮國遣使進香

几筵前遣王一人主祭行禮如儀○十月初五日以奉移

梓宮行啟奠禮陳設禮儀與前奉移

觀德殿啟奠禮同○初七日奉移

梓宮於

靜安莊是日儀駕全設陳

冊寶於采亭王公百官及公主福晉命婦咸分班於

觀德殿

靜安莊兩處齊集至時奉移

梓宮

皇子祭酒三爵衆隨行禮舉哀畢

梓宮登大昇輦

皇子詣前祭酒三爵校尉舁行鑾儀衛官更番翼

衛隨行所過門橋遣內大臣祭酒近

靈駕隨行王公嫔戚等在

觀德殿大門內跪舉哀候

梓宮過

皇子於左旁隨行次奏遣之王公隨行次內務府
婦女一百八十人乘馬隨行次稍間豹尾班侍
衛隨行次王公百官隨行王以下奉恩將軍以
上內大臣侍衛內府官員於景山東門外按翼
排跪舉哀民公侯伯以下有頂帶官員以上及

閑散宗室覺羅等於景山後西旁東嚮跪舉哀

候

梓宮過隨行

貴妃

妃

嬪及宮人豫赴

靜安莊殯宮後左旁祇候公主近支王福晉等於
殿內齊集諸王福晉以下二品夫人以上咸於

二門內兩旁序立內府官員護軍領催等之妻
於大臣命婦後序立均候

靈駕至跪迎舉哀王公百官等於大門外排跪舉哀
奉安

梓宮於殯殿

皇子祭酒三爵衆隨行禮畢各退○初九日行暫
安致祭禮陳羊酒饌筵楮帛如數王公官員公
主福晉命婦等咸齊集讀文祭酒舉哀行禮儀

均與月祭同○初十日

諭旗人因孝賢皇后梓宮暫安觀德殿不敢舉行嫁娶亦未可定今皇后梓宮既經安奉靜安莊其有

未經嫁娶者著照常舉行欽此○二十五日行冬

至致祭禮

十一月初二日冬至因直
齋戒之期豫於是日致祭

陳金銀定

五萬楮錢楮帛各五萬饌筵三十一席羊九酒

十有五尊王公官員及公主福晉命婦皆齊集

讀文致祭行禮舉哀儀與中元致祭禮同○十

一月二十五日

几筵前三次奠獻如常內外停止舉哀嫺戚婦女祭

酒○又奏準王公大小官員兵丁人等仍照例

於十二月二十日後張挂門神對聯○十二月

二十一日行歲暮致祭禮

因齋戒
改期

陳羊酒饌筵

楮帛如數齊集讀文致祭儀與冬至同○又奏

準乾隆十四年正月初一日

几筵前照常三次奠獻停止舉哀○十四年正月十

一日月祭因逢齋戒移於十三日致祭行禮○
二月十七日行清明致祭禮不焚楮帛進挂楮
錢寶花一座陳饌筵二十五席羊九酒十有三
尊齊集行禮儀與歲暮同○二十六日奏準金
川告捷擇吉於三月初九日祭告

几筵遣官及執事人員冠綴纓緯素服行禮○三月
十一日行期年致祭禮陳羊酒饌筵楮帛如數
王以下有頂帶官員以上公主福晉以下三品

官命婦以上內府官員男婦咸齊集讀文致祭
皇帝親詣祭酒衆隨行禮如儀○是日奉

旨孝賢皇后喪紀已周於明日起諸皇子前往靜安
莊著冠綴纓緯前往齊集人員並彼處執事人員
亦著冠綴纓緯○七月十五日行中元致祭禮陳
金銀定五萬楮錢五萬楮帛一萬饌筵十有一
席羊五酒五尊儀與十三年致祭禮同○十一
月初三日行冬至致祭禮陳金銀定三萬楮錢

楮帛各萬饌筵十有一席羊三酒五尊儀與十
三年冬至致祭禮同○十二月二十五日行歲
暮致祭禮陳設禮儀與冬至致祭禮同○十五
年三月十一日行再期致祭禮陳羊酒饌筵楮
帛如數讀文致祭

皇帝親詣祭酒儀與期年同○六月十一日行服闋
致祭禮陳羊酒饌筵楮帛如數王以下有頂帶
官員以上公主福晉以下二品官命婦以上及

姍戚內府官員男婦咸齊集讀文致祭

皇帝親詣祭酒衆隨行禮儀與百日致祭禮同是日

諸

皇子皆除服○是年中元冬至歲暮致祭咸與十
四年致祭禮同○十二月初二日奏準先經奏
定

孝賢皇后三周年後遵照

孝誠仁皇后在沙河致祭之禮停止每日奠獻及滿月

致祭照

陵寢致祭例每月朔望獻羊酒果品點香燭四時大祭
陳俎豆牲帛醴齊點香燭讀祝文致祭凡遇

慶典致祭獻酒桌點香燭讀祝文致祭忌辰照周
年禮奠羹飯肴膳饌筵焚楮定讀文致祭雍正
十一年奏準改用補服伏思

陵寢致祭是於神牌前與

几筵前致祭究屬有別三年後若仍照常奠獻又與

喪儀無殊謹擬

孝賢皇后三周年後應將滿月致祭及每日奠獻皆
停四時祭祀忌日致祭不陳冠服不設楮錢惟
獻肴膳饌筵讀文行禮舉哀寒食進挂楮錢寶
花一座除夕陳楮錢二萬金銀楮定二萬同寶
花送燎祭酒於正中咸停齊集仍設儀駕恭遇
慶賀祭告仍照見今

靜安莊祭告禮行每月朔望獻羊一饌筵一祭酒

致祭停止舉哀庶三年後之禮儀與神牌前祭
奠皆有分別○又奏準

靜安莊致祭遣諸

皇子輪流祭酒○十二日

諭次年正月十一日孝賢皇后滿月禮致祭著於初
七日次年三週年亦并於初七日讀文致祭至三
週年仍照常致祭欽此○十七年七月十七日奏
準

地宮工程於九月內告竣謹擇吉期於十月十三日

奉移

孝賢皇后梓宮於二十七日安葬

地宮○九月二十日

諭本年十月二十七日行孝賢皇后安奉地宮禮稽
之國家舊典

皇祖聖祖仁皇帝於

孝誠仁皇后

孝昭仁皇后

孝懿仁皇后皆曾親送自應謹遵

祖制但奉移梓宮距安葬地宮之期計逾旬日朕於十月十三日至靜安莊臨送後擬於二十二日自京

起鑾恭謁

祖陵禮畢屆期詣孝賢皇后陵寢親行視奠欽此○又

奏準

皇后恭送

孝賢皇后梓宮應於至

陵日先謁

四陵畢乃謁

孝賢皇后陵寢行禮○十月初八日行恭題

神主禮前期工部敬製

神主於靜安莊

几筵殿之東廡繕字掃青如儀至日陳儀駕於

殯宮大門外設黃案於

几筵殿內正中設鳳輿於階上屆期

欽命大臣一人詣東廡

神主前跪上香行三叩禮興恭奉

神主禮部堂官導至

几筵殿奉安黃案上滿漢大學士二人朝服盥手詣

主案前行一跪三叩禮興恭題

神主畢復行一跪三叩禮退

欽命大臣詣



主案前一跪三叩恭奉

神主安奉鳳輿於輿前行一跪三叩禮校尉昇輿前

列儀駕如儀是日升祔

奉先殿

詳升祔儀

○十一日行祖奠禮陳設禮儀與啟奠同

○十三日奉移

梓宮儀駕全設陳

冊寶於鳳輿近

靈駕隨行之王公等嫡戚人員於二門外齊集親王

以下八分公以上及送往之大學士內大臣
侍衛於大門外兩旁齊集不入八分公民公侯
伯以下四品官以上及閒散宗室無執事之內
府官員於大門外兩廂前排班齊集近支福晉
公主郡主等於殿內齊集在外福晉以下二品
大臣夫人以上並嫔戚夫人婦女咸於大門內
右旁齊集內府佐領內管領下官員護軍領催
等妻於大臣官員命婦後齊集各於齊集處舉

哀

皇帝親詣祭酒時

皇子行禮衆隨行禮進小舉奉

梓宮出大門外登大昇輦禮部堂官祭輦三祭酒三

叩校尉昇輦

靈駕發

冊寶輿前行校尉執儀駕乘馬按次前導諸

皇子暨

簡命近行王公嫔戚及各執事官皆徒步舉哀隨行
次內務府婦女六十人乘馬隨後行次女侍車
行恭理喪儀王公大臣內務府禮工二部鑾儀
衛堂官於左右巡視翼衛所過門橋遣內大臣
祭酒至不送往王公跪送後

皇子衆等乃止哀乘騎隨行每昇校更班時皆下
馬跪

靈駕發仍乘馬昇夫日分三十班以內監十人輪流

於

靈駕前左右步行諸王各官皆於豹尾班後以次乘馬隨行沿塗分站豫設

蘆殿繞以黃幔城網城百步外豎下馬柱左右各一漢官及年老王公百官先往

蘆殿恭候隨行之王公百官將至宿次相近處豫由別路先至

蘆殿後網城門外排班舉哀跪迎

靈駕至末班

皇子衆皆下馬舉哀隨行儀駕由黃幔城外兩旁行至幔城南門前陳列王公百官候

靈駕入幔城後門乃由黃幔城繞至前門外按翼序立舉哀奉安

靈駕於蘆殿校尉舁夫皆出乃行夕奠禮祭酒舉哀畢執事官奉

冊寶交內監設於兩旁闔門皆退恭理喪儀王公大

臣戒所在官軍祇嚴宿衛翼日昧爽陳儀駕出
冊寶啟正門各執事皆辦

皇子行朝奠禮詣

靈駕前舉哀祭酒三爵衆隨行禮舉哀執事各官率
校尉舁夫進恭舁

靈駕發

皇子跪候過隨行衆舉哀隨行至首班衆止哀乘
馬隨行在塗朝夕奠舉哀一如初日送往

山陵之王公百官日於殿外黃幔城網城外按翼序
立所過五十里內守土官咸素服於道右序立
候

靈駕至舉哀跪迎至宿次詣網城門外行朝謁三跪
九叩禮奠獻時各於右翼班末隨行禮舉哀

妃

嬪等於早晨朝奠隨行禮舉哀瞻望

靈駕發由別路行不與晡奠每程儀同是日奉移

慧賢皇貴妃

哲憫皇貴妃金棺一同送往○十七日

梓宮至

陵守

陵寢貝勒公大小官員皆於興龍口之外跪迎舉哀
靈駕由紅門西柵闌入由神路行至

陵寢大門外降大昇輦升小輦由中門入奉安

饗殿設

几筵陳

冊寶於左右

皇子祭酒三爵衆隨行禮畢各退○是日遣官各

一人祇告

后土

昌瑞山之神○十九日行暫安致祭禮儀駕全設陳

羊酒饌筵楮帛如數送往之王以下大臣官員

以上及



陵寢貝勒公大小官員執事人等咸於大門外齊集
陵寢居住之貝勒公夫人官員命婦執事人等之妻
咸齊集讀文致祭行禮如儀○大葬前期三日
遣官各一人祇告

天

地

太廟

社稷○二十五日行遷奠禮設儀駕陳羊酒饌筵楮

帛如數王以下大小官員

陵寢貝勒公大小官員執事人等

陵寢居住之貝勒公夫人官員命婦執事人等之妻
咸齊集讀文致祭

皇帝親臨祭酒

皇子每祭行一叩禮衆隨行禮舉哀至時奉移

梓宮

皇子祭酒衆皆隨行禮舉哀婦女等豫詣方城西

旁候

梓宮過舉哀跪迎

梓宮由方城入暫安

梓宮於蘆殿正中登龍輜北嚮陳

冊寶於前進饌筵

皇子祭酒三爵衆隨行禮舉哀畢各退○是日儀

駕皆焚訖○二十七日

皇帝親臨祭酒三爵

皇子行禮衆隨行禮舉哀至時

欽命諸臣恭率校尉奉移龍輜由隧道入

地宮奉安於寶牀設

冊寶於兩旁石几

皇帝親視奉安畢出乃掩閉

元宮

皇子於祭臺前祭酒三爵三叩衆皆舉哀隨行禮

畢卒哭各退○是日恭移

慧賢皇貴妃

哲憫皇貴妃金棺同葬○是日以奉安

地宮禮成遣官各一人祇告

后土

昌瑞山之神

欽定大清會典則例卷八十八